

續  
文  
獻  
通  
考

續文獻通考卷之六十一

皇明進士雲間王圻纂輯

學校考 書院

書院之制昉自石鼓嶽麓白鹿睢陽皆碩德鴻儒講道明教之地世所謂四大書院者是也厥後書院遍天下日增月益星羅而鱗次然多尚虛名而實學荒矣按諸本以淮海列四大書院之中蓋以淮海書院在丹徒疑卽應天書院也不知宋之應天書院乃在歸德府亦或以睢陽名之人以其字之相近遂以睢陽爲淮海非矣又玉海所謂四大書院者有嵩陽而無石鼓今當以玉海爲正

浚儀王氏曰漢初郡國往往有夫子廟而無校官且不置博士弟子員其學士嘗課試供養與否不見經傳然諸儒以明經教于其鄉率從之者數百人其齊魯燕趙之間詩書禮易春秋論語名家者甚盛則設書院助是矣蓋未修庠序之教士病無所于學相與擇勝地立精舍爲羣居講習之所若岳麓白鹿洞之類是也逮慶曆熙寧之盛學校之官遂徧天下

宋元

白鹿洞書院在江西南康府廬山五老峯下唐李渤與兄涉俱隱於此後爲江州刺史卽洞創臺榭南唐昇元中因洞建學館置田以給諸生學者大集以李善道爲洞

主掌教授當時謂之白鹿國庠 宋朝太平興國元年

三月庚寅知江州周述言廬山白鹿洞學徒數千百人

請賜九經書肄習詔從其請仍驛送之五年六月己亥

以白鹿洞主明起爲褒信主簿賜陳裕三傳出身

起裕以講

學爲業故有是命

咸平五年勅有司重修繕又塑宣聖十哲之

像祥符初直史館孫冕請以爲歸老之地皇祐五年其

子琛卽故址爲學館十間牌曰白鹿洞之書堂俾子孫

居而學焉郭祥正爲記淳熙六年南康守朱熹重建爲

賦示學者曰明誠其兩進抑敬義其偕立允莘摯之所

懷謹巷顏之攸執呂祖謙爲記

嶽麓書院在湖廣善化縣宋開寶九年潭州守朱洞始創

宇于嶽麓山抱黃洞下以待四方學者作講堂五間齋序五十二間孫邁爲記咸平一年潭守李允則益崇大其規模三年王元之爲記曰西京首述文翁東觀先書衛颯其理蜀郡教桂陽率以庠序爲先云云中開講堂揭以書樓塑先聖十哲之像畫七十二賢瀟湘爲洙泗荆蠻爲鄒魯四年三月二十日辛卯允則奏岳麓山書院修廣舍宇生徒六十餘人請下國子監賜諸經釋文義疏史記玉篇唐韻從之祥符五年山長周式請于太守劉師道廣其居譚綺爲記式以行義著八年召見便殿拜國子主簿使歸教授給詔因舊名賜額仍增給中祕書于是書院之稱聞天下乾道元年帥臣劉珙重建

爲四齋定養士額二十人二年十一月張栻爲之記淳熙十五年帥臣潘時廣二齋益額十人陳傅良爲記淳祐六年賜御書岳麓書院四字揭之中門書院南風雪亭之下別建湘西精舍

應天書院

卽睢陽書院應天府乃歸德府也宋曰應天金曰歸德

宋祥符二年二

月二十四日庚戌詔應天府新建書院以曹誠爲助教初有戚同文者通五經業聚徒百餘人許宗度郭承範董循陳象與王礪滕涉皆其門人于是誠卽同文舊居建學舍百五十間聚書千五百餘卷願以學舍入官令同文孫舜賓主之故有是命并賜院額天聖三年應天府增解額三人六年九月晏殊言請以王洙充書院說

書從之明道二年十月乙未置講授官一員景祐二年十一月辛巳朔以書院爲府學給田十頃

范仲淹南京書院題名記皇帝功揭日月澤注河漢金華塵積絃誦風希睢陽先生同文賁于丘園教育爲樂祥符中曹氏請以金三百兩建學于先生之廬以舜賓幹其裕王濟掌其教張吉甫領其綱真宗嘉嘆面可其奏盛度文其記陳堯佐題其榜章甫如星縫掖如雲聚學爲海淬詞爲鋒二十年間羽儀臺閣蓋翩翩焉

嵩陽書院在河南登封縣太室山下五代時建宋至道元年七月甲辰賜院額及印本九經書疏祥符三年四月癸亥賜太室書院九經景祐二年九月十五日己丑西

京河南府重修太室嵩陽書院王曾奏置學官詔以嵩陽

書院爲額賜田一頃至道三年五月戊辰河南言甘露降書院講堂已上古今號稱四大書院

北直隸

南宮北宅書院宋祥符三年七月壬寅詔南宮北宅大將軍以下各赴書院講讀經史諸院十歲以上並入學受經學書委侍教勤心誘勸

太極書院在燕京城內元中書行省楊惟中以河朔未知濂洛之學建書院及周惇頤祠以二程張楊游朱配食刻太極圖通書西銘于祠壁延趙復王粹等爲師由是河朔始知道學按元史世祖與姚樞議建選取遺書



八千餘卷置其中所載微不同

諫議書院在昌平院元爲劉蕡建設山長主之  
文靖書院在房山縣元趙密賈瓌爲師劉因建

益津書院在霸州元宮君祺建

靜修書院在新安縣元劉英輩爲劉因建

毛公書院在河間縣元建祀漢毛萇

董子書院在景州廣川鎮元王思誠奏建祀董仲舒

太行書院在獲鹿縣

封龍書院在元氏縣封龍山漢李躬授業之所唐郭震宋

李昉元李治皆嘗講學于此

西谿書院在元氏縣龍首峯西唐姚敬棲遁之所宋有九

經張著爲山長復增葺之

中谿書院在龍首峯下宋李昉授業之所元中統初李治增葺之

壁里書院在新樂縣西元邑人趙士廉所立義學祭酒蘇天爵作記

明道書院在鎮寧軍

卽今開州

初程純公以權御史裏行出判

鎮寧旣去士民思之創以祀公後爲士人講學之所

崇義書院在開州元國子生唐元建爲育材之地且置學田四頃餘請于朝賜名崇義

景賢書院在宣府城南紅桃口元相康里脫脫建別墅延師訓子鄉人化之賜名景賢書院碑碣尚存

西關書院在龍門衛治東南

雲州書院在雲州堡東南

南直隸

明道書院舊在應天府學宮宋淳熙初劉珙建祀程明道  
後守劉桀改築新祠于鈴轄故地李珣扁其堂曰春風  
旁二塾曰主敬行恕尋廢後守吳淵更創理宗親書明  
道書院四大字爲額與四書院等馬光祖繼之又給田  
增廩

南軒書院舊在天禧寺宋張栻嘗讀書於此轉運使真德  
秀爲立祠後馬光祖建主一堂求仁任道明理潛心四  
齋極高明樓且增撥田以惠學者元移置于城東明道

書院之西南

昭文書院在應天府湖熟鎮元至元間建

崇聖書院在鳳陽府第一山漢孔安國父子相繼爲臨淮  
守後人因建書院于此上有先聖燕居殿遺址

西湖書院在潁州西湖濱宋歐陽修守潁樂其風土晚年  
終老于此遂築書院

學道書院一在長州縣學南宋咸淳間建以教言氏子孫  
元廢一在常熟縣西元至順間置名文學書院置山長  
甫里書院在蘇州府東五十里本唐陸龜蒙祠元元統間  
總管錢光弼奏建書院置山長

文正書院在蘇州府范仲淹宅元至正間總管吳秉彛請

以祠堂置

和靖書院在蘇州府治東南宋尹焞舊有讀書庵在虎丘寺後人立書院元祐初移建于此後復移虎丘寺名虎丘書院

鶴山書院在蘇州府城西南隅宋理宗賜魏了翁第宅于此并賜鶴山書院四大字元至順間博士柯九思奏復書院虞集撰記

孔宅書院在松江府城北七十里舊有孔子廟在慧日院側宋淳熙間院僧浚渠得寶玉璧三環二簪一藏之郡學蓋孔子三十四代孫禎宦遊至吳因立家廟葬衣冠于此寶蓋墓中物也元至元間里人章弼建書院以居

鄉俊之來學者

九峯書院在松江府治西北宋邑士衛謙建按華亭趙驥  
建書院議云華亭尉舊有折桂閣宋李夔爲尉時生子  
綱于此後綱爲相因呼相公閣今因建書院并立祠祀  
之

西湖書院在松江府城內瑁湖泳波亭舊址元郡守張之  
翰建

清忠書院在上海縣元至正間邑人章元澤建取宋仁宗  
賜其祖得象清忠二字爲名

龜山書院在常州府城東南六里宋楊時寓常州講道于  
此紹定間郡守鄭必萬增剏其舊書堂爲書院元設山

長

東坡書院在常州府治東南祀宋蘇軾地卽軾卒處也

淮海書院在丹徒縣治西宋南渡後淮士多寓京口因建書院爲講學之地故名

濂溪書院在丹徒縣治東南宋周惇頤依舅氏鄭向居此後人因建書院祀之

丹陽書院在丹陽縣宋景定中劉貢士建郡守朱祺孫聞于朝賜額

中義書院在金壇縣治西宋太府丞張鎬荆家塾教族人子弟取中之以孝弟之義爲名

龍山書院在金壇縣南顧龍山宋咸淳間立

茅山書院在金壇縣西茅山宋初建後廢紹定中知縣孫子秀因其故址新之以待遠學

謝安書院在楊州府城東北召伯鎮因晉謝安鎮廣陵故建

安定書院在泰州城西安定先生胡瑗如阜人爲師有道後人宗仰因立書院又一在湖州府治東北宋淳祐中建

文翁書院在無爲州儒學前內有文翁祠及碑記  
龍眠書院在舒城縣治東宋李公麟讀書處蘇軾黃庭堅嘗往來于此

三賢書院在合肥縣治東祀宋包拯馬亮王希呂

續文獻通考

卷之六十一

八

三十五十三

京



山谷書院在安慶府治東北今爲府學文廟後有祠堂祀  
宋黃廷堅

二良書院在安慶府治東祀漢文翁朱邑

近思書院在安慶府治北祀周程張朱四子

天門書院在太平府天門山宋郡守陳埏奏建理宗書額  
內有周子二程子張子朱子張南軒呂東萊七賢祠

采石書院在太平府采石山宋嘉定間郡守賈實建爲士  
子講學之地

丹陽書院在當塗縣南黃池八十里元至大間建

齊山書院在池州府城西六十里元建設山長職教授

李白書院一在貴池縣華竹嶺一在青陽縣九華山化成

寺西斷碑存焉一在銅陵縣五松山一在石埭縣杉山  
紫陽書院在徽州府治東宋淳祐中郡守韓浦爲朱晦菴  
建理宗書額賜之元陳浩記

明經書院在婺源縣元至大初里人胡浣建官爲設山長  
主之

### 山西

冠山書院在山西太原府冠山元呂思誠父祖數世皆讀  
書于此後以宰相言賜額建于故宅虞集作記

松峯書院在樂平縣南四十里羅庄宣聖齋孔克威建呂  
思誠作記

溫公書院在夏縣學之東元至正間重建祀司馬溫公

董澤書院在開喜縣東三十里宋趙鼎世居董澤其後六世孫質翁仕元爲國子博士歸作書院于故里虞集爲記

晉山書院在大原府城東北隅

暖泉書院在蔚州西三十里暖泉里元工部尚書王敏建文忠書院在澤州陵川縣治南文忠元郝經謚也

山東

閔子書院在山東濟南府治東五里閔子墓前元建設山長

伏生書院在鄒平縣東北一十八里元主簿楊溫建祀漢伏勝

泰山書院在泰安州北五里宋孫明復講道之所石守道有記

洙泗書院在曲阜縣西北八里卽孔子講道之所元設山長

聖澤書院在汶上縣西南三十里一名孔堂世傳孔子宰中都政餘講學于此

尼山書院在曲阜縣尼山上宋慶曆間建廟元至順中孔思晦以故廟已毀民冒耕祭田且百年乃復其田請立書院從之

子思書院在尼山旁舊有營運錢萬緡貸于民取于錢以供祭祀久之民不輸子錢并負其本孔思晦理而復之

曾子書院在鄒城縣西北六十里又嘉祥縣南四十里亦有曾子書院

性善書院在滕縣西北元大德間建取孟子告滕文公性善義

思聖書院在費縣西九十里元至元間建

野齋書院在東阿縣境內元翰林承旨李謙卒詔卽其故居建書院立山長以祀謙

弦歌書院在武城縣治南子游爲武城宰其治在今兗州府費縣西北此以名同故立書院祀之舊在縣西四十里元泰定中徙于南學士承旨劉唐扁名學士張起巖撰記

鄭玄書院在卽墨縣東南二十五里

東萊書院在萊州府治西南宋呂東萊以先世萊州故號東萊先生後人慕之爲立書院于此祀焉

河南

儒林書院在河南禹州城南二十里元州人楊可道建

崇正書院在夏邑縣慈勝寺西

濬濱書院在永城縣南甫城鄉元縣尹張思立建

潁谷書院在封登縣西南宋崇寧間建並立廟以祀宣聖

後廢復建

伊川書院在嵩縣治北元延祐間建東有九賢祠

洛西書院在永寧縣治東元延祐間建有五賢堂祀宋周

濂溪程明道伊川邵康節張橫渠司馬溫公後廢復建  
同文書院在洛陽縣西南

諸葛書院在南陽府臥龍崗漢諸葛孔明故地之東元至  
大中建程鉅夫作記

涑水書院在光山縣治西涑水先生宋司馬光號也光父  
池爲光山令時生光于此後人因構書堂祀光故名

謝顯道書院在上蔡縣宋建祀謝顯道

陝西

魯齋書院在陝西咸寧縣治東北元延祐中奉元路臣爲  
故臣許衡建

學古書院在三原縣治西北元延祐中因舊址重建蕭軒

有記

橫渠書院在郿縣東五十里卽宋儒張橫渠故居立書院  
中有祠堂元泰定四年建文禮愷作記

岐陽書院在鳳翔府元天曆二年勅賜書院額祀周文憲  
王仍命設學官春秋釋奠如孔廟儀

浙江

龜山書院在浙江餘杭縣治南宋崇寧末楊時知縣事有  
遺愛于民民請立書院祀之仍延師教子弟其中

城南書院在杭州祀張九成

西湖書院在杭州府治北本宋太學故基元至元末肅政  
廉訪使徐琰改爲書院



東岡書院在海寧縣東三十六里宋邑人賈氏置義塾元至正間改爲書院

宣公書院在嘉興府治北元至元間建祀唐宣公陸贄

傳貽書院在崇德縣治東北宋儒潛庵輔廣讀書之所廣德朱熹爲扁堂曰傳貽蓋以傳先貽後爲任也後人卽其所立書院文及翁爲記以祀廣焉

白社書院在崇德縣宋末衛富益建

東湖書院在湖州長興縣東北二十五里元時邑人蔣必勝勅詔賜額名

釣臺書院在嚴州府城東五十里乃漢嚴光隱釣處宋范仲淹始勅祠宇紹定中郡守陸子適卽其地建書院

石峽書院在淳安縣東北五里宋方逢辰講道之所度宗  
手詔賜額名

麗澤書院在金華府城東北五里宋呂祖謙會友講道于  
此取易兌象以扁其居嘉熙中恩賜麗澤書院元御史  
王龍澤有記

月泉書院在浦江縣西二里宋咸淳間知縣王霖龍構精  
舍于泉上元改爲書院

四賢書院在金華府城中元時江浙省建以祀郡儒何基  
王栢金履祥許謙

齊芳書院在蘭溪元唐良驥延金仁山講學于此  
仁山書院在蘭溪祀金仁山

續文獻通考卷之二十一  
一  
澈東書院在蘭溪宋葉誕讀書所

北山書院在金華盤溪上宋末爲何基立

桃源書院在寧波府城西三十里宋王說隱居教授神宗特恩補官仍書桃源書院四大字賜之

廣平書院在奉化縣東一十里宋舒璘講學于此王應麟作記

甬東書院在寧波府城東五里宋鄭清之建以祀樓昉理宗御書扁賜之

慈湖書院在慈谿縣治北宋郡守劉黻以祀楊簡元設山長主之

杜洲書院在慈谿縣西北六十里童居易讀書之所

東湖書院在寧波府城東三十里元時邑人陸黃祐建程端學作記

鄧山書院在寧波府城西五里元時邑人趙儒建祀宋朱文公後設山長主之袁桷有記

鄞江書院在寧波府治東南元時邑人張式良建

上蔡書院在台州府東湖上宋景定中州守王華甫建祀上蔡謝良佐初良佐遭黨禁未解而卒子孫有流落台州者州守黃當訪而得之因祀良佐于州學後華甫至遂建書院徙祀焉又僊居縣南亦有上蔡書院

桐江書院在僊居縣西四十五里宋方斲本唐方干之裔居台州朱熹嘗書鼎山堂扁遺之元皇慶中其孫志道

建書院以祀公

鑑溪書院在台州府城東南一百三十里元邑人柯鵬建  
興濟書院在黃巖縣東南五十里元元貞中建

安洲書院在僊居縣東二十五里元至元中隱士翁森建  
永嘉書院在溫州府城西南宋淳祐中建中奉宣聖燕居  
像東室祀伊洛諸儒西室祀鄉先賢

宗晦書院在樂清縣舊名枕堂宋咸淳中改今名宗晦菴  
也

中村書院在泰順縣宋淳祐中吳子良建  
侯林書院在泰順縣宋淳祐中吳子益建

清獻書院在衢州府城北宋咸淳中郡守請于朝卽趙抃

故居立書院因以朴謚扁焉

柯山書院在衢州爛柯山右朱郡人毛友鄭可簡于此建精舍讀書淳祐中郡守請于朝立書院

南塘書院在江山縣宋逸平先生徐存講學之所逸平卒而朱子往吊書院已爲毛氏墓田朱子因賦詩致哀今重建于騎石山下曰逸平書院

包山書院在開化縣北三十五里宋汪應辰有軒名聽雨紹定中改爲書院

明正書院在西安縣東宋汪應辰及子逵寓衢郡守張嶠築室居之後人卽此建祠咸淳中趙孟奎重建扁曰明

正

桂山書院在處州龍泉縣西十五里宋端平間邑人張奉  
議立以訓子弟丞相吳潛題扁

石門書院在青田縣西七十里石門洞宋淳熙九年朱文  
公提舉常平至此愛欲居之元至正中廉訪副使王俛  
始卽謝客堂故址建

明善書院在松陽縣

獨峯書院在縉雲縣東三十三里朱文公至此愛其山水  
似武夷嘉定中郡人葉嗣昌建

美化書院在縉雲縣東六十里因朱文公講道于此嘉熙  
中縣尉陳寔建

稽山書院在紹興臥龍山之陽宋淳祐中馬天驥建祠以

祀朱文公以公嘗提舉浙東常平也後吳革請祠爲書院

高節書院在餘姚東北一十五里漢嚴子陵墓側宋淳祐中劉公黼建有夫子燕居祠外置遂高絲風蒼雲三亭扁華表于道旁曰客星山

鼓山書院在新昌縣祀石子重

## 江西

梧桐書院在江西奉新縣南唐時中庸明誠兩羅先生講道之所山多梧桐故名

東湖書院在南昌府治東南宋郡丞豐有俊假李寅廬虛閣故址創書院以館游學之士今爲南昌縣學



宗濂書院在南昌府治南宋江萬里以濂溪周惇頤嘗典  
是邦葺宇祠之扁曰宗濂精舍元移于東湖改爲書院  
又寧州治東旌陽山麓有濂溪書院卽周惇頤作簿時  
建相連有山谷書院

華林書院在奉新縣華林山宋雍熙中光祿寺丞胡仲堯  
建四方游學者常數百人

龍光書院在豐城縣西鰭池廟側元至正間邑人陳必強  
建取寶劍龍光爲名

貞文書院在豐城縣南八十里元揭傒斯之父來成學行  
師表一方謚曰貞文後傒斯請立書院遂賜以額

鄱江書院在饒州府城北宋朱熹門人金去偽講學之所

忠定書院在餘干縣琵琶洲宋丞相趙汝愚與朱熹講道處忠定汝愚謚也

東山書院在餘干縣冠山左趙汝愚弟汝靚建朱熹嘗講道于此謝枋得記

石洞書院在餘干縣東五十里今屬萬年縣宋雙峯饒魯講道之所

南溪書院在餘干縣東政新鄉今萬年縣境宋提刑柴中行講學之所元時其子孫作書院以教里族事聞爲置官

慈湖書院在樂平縣治東南宋楊簡爲令以禮讓變俗時號慈湖先生簡沒民思不忘因立書院

新田書院在浮梁縣古樓鎮宋侍郎李椿年建今其地名義庠塢又縣之景德鎮有長蘄書院宋李齊愈建

錦江書院在安仁縣西南四十里宋倪价講學處元至元間其子鏗請賜額

初庵書院在德興縣治南元邑人傅立建立號初庵

稼軒書院在廣信府鉛山縣南二里宋辛棄疾讀書處初名瓢泉書院後以其號名

端明書院在玉山縣治東宋端明殿學士汪應辰講學處元監縣壽安始建書院蘇天爵記

象山書院在貴溪縣宋陸九淵講學之所袁甫建書院以錢時主講

鵝湖書院在鉛山縣鵝湖山下宋朱熹與陸九淵會講于此

疊山書院在上饒縣南安輯鄉宋謝枋得講學之所  
桐源書院在貴溪縣西一十里宋國子學錄高可仰建以教鄉之子弟

藍山書院在弋陽縣水南地元初張卿弼隱居教授于此  
學者甚衆其門人楊應桂中益章爲作書院處之虞集  
記

景星書院在九江府城東唐李渤刺江州元和中以右拾  
遺召不拜韓愈書有景星鳳凰爭先快覩之語後人因  
建景星書院

濂溪書院在九江府廬山麓宋周惇頤建後守潘慈明增築朱熹爲記

靖忠書院在彭澤縣治觀音山後元邑令王國輔建取晉陶潛之靖唐狄仁傑之忠爲名

盱江書院在建昌府南城縣治西北宋李觀教授之所中有明倫堂前有洙泗堂左右列誠正格致四齋元末燬南豐書院在南豐縣治東元至正間知州史文斌建中有孔子殿左有曾鞏祠堂後有講堂齋舍

臨汝書院在撫州府城西南二里宋馮去疾以朱文公嘗臨是邦故立書院于洲山上宋元皆有官領之

我峯書院在撫州城南青雲峯左宋叅政李壁爲縣令黃

新建堂面巖峯故名

槐堂書院在分縣學東宋令陳詠之建以陸子靜家塾之名扁曰槐堂

鹿岡書院在宜黃縣南四十里宋邑人孫子野建

文溪書院在崇仁縣東陶家巷口運幹陳溪月建

草廬書院在崇仁縣南御書閣基前元邑令阿里建

邵庵書院在崇仁縣治北元邑令重喜建

青田書院在金谿縣北三十里元邑士洪觀瀾宗陸氏學

建此以祀三陸先生

柳塘書院在樂安縣治東後改梅隱書院元人建

鰲溪書院在樂安縣治東元邑人夏友蘭建吳澄記

高峯書院在臨江府新金縣治東宋縣令黃榦建

清江書院在清江縣治東宋著作郎張洽建

金鳳書院在臨江府治東南隔江金鳳洲上宋國子司業  
黎立輔建立輔又有講書堂在新喻縣

鷺洲書院在吉安府白鷺洲上宋淳祐間知吉州江萬里  
建延歐陽守道以教俊秀

龍洲書院在泰和縣治南贛江之上宋嘉泰間縣令趙汝  
暮建周必大記

文溪書院在泰和縣治西宋里人曾季禮講學授徒之所  
邑令趙師奭記

雲津書院在泰和縣治南龍洲之上宋嘉定間里人劉逢

原建曾歷記

柳溪書院在泰和縣治西宋嘉定間里人陳德卿建嚴萬全記

清節書院在泰和縣治北宋蕭楚以春秋教學者卒謚清節元至正間其宗人繼文作祠扁曰清節書院

匡山書院在泰和縣東匡山下昔里人羅洞晦清修不仕後唐徵拜官不就從遊益衆名所居曰匡山書院

磻溪書院在吉水縣西宋周澤之建

陽豐書院在永豐縣西元進士陳應求與弟起原建後賜額設官領教

武城書院在永豐縣西元學士曾德裕建派自武城南分



故名吳澄記

雲興書院在萬安縣治西宋周惇頤趙抃皆嘗經此人因立像祀之且爲縉紳講學之地

西澗書院在瑞州府治西宋劉渙家高安子恕孫羲仲三世一節端平初知州張韞立書院西澗渙號也

樂善書院在瑞州府治南宋郡守王淹以郡中宗姓寔繁乃創書院置田以教育宗子孤幼者

文溪書院在瑞州府城南文溪上宋陳仲微建爲讀書之所

正德書院在上高縣南三十里元提舉姜榮建趙孟頫書扁刻石

石溪書院在新昌縣東北四十里元提舉胡俊孚建

南軒書院在袁州府東湖上中有張南軒祠歲時祀之

鈴岡書院舊在分宜縣東宋建邑庠遂廢淳祐初邑宰王  
抗建祠以祀周二程張朱仍扁曰鈴岡書院

胡安之書院在萍鄉東二里宋朱子門人胡安之讀書所  
宗濂書院在萍鄉縣東五十里宋周濂溪監稅盧溪鎮時  
立書院以授門人學後人卽其地建祠又于縣治南立  
濂溪書院皆祀焉

張巖書院在萬載縣治東臨江儒學教授張千崖立有禮  
殿以祀先聖有祠以祀周程張邵司馬六君子虞集記  
其事

濂溪書院在贛州府贛縣治東三里周濂溪嘗通判虔州  
後人因建書院

先賢書院在贛州治東宋楊澹軒精舍故址其門人尚書  
陳韓請于朝建之

安湖書院在興國縣東宋縣令何時建文天祥記

梅江書院在寧都縣宋縣令夙子興建

湖廣

東山書院在武昌府黃鵠山東宋建

南湖書院在武昌縣治東宋權壽昌軍事京覲建元設山  
長領之

龍川書院在武昌縣南金牛鎮元時領以山長

竹溪書院在蒲圻縣東五里宋建蘇軾書額

新溪書院在蒲圻縣宋進士周登仕建

疊山書院在興國州東一里湖堤上宋謝枋得寓居著書于此今稱其地曰謝公墩

南湖書院在承天府沔陽州學宋建以祀武成王及狄梁公張太冲

東山書院在荊門州東宋知軍孫鏞二子何僅讀書于此後皆爲狀元學者稱二孫先生爲立祠稱東山書院  
隆中書院在襄陽隆中山蜀漢諸葛亮嘗寓此後人因建廟祀之元改爲書院

鹿門書院在襄陽府治南任顯宗居此

長庚書院在德安府唐李白讀書處元程鉅夫記

河東書院在黃州府治東宋天聖中程珦爲黃陂尉生二子顥頤于官舍寶祐時守李節請建書院祀之

東坡書院在黃州府治東蘇軾謫居于此及去以田宅俾潘大臨陳慥教養學徒後人爲建書院

南門書院在蘄水縣南謝朝宜建祀王逸少陸鴻漸蘇子瞻

公安書院在荊州府公安縣宋宣撫孟珙因蜀士聚于公安爲建書院以没入田廬隸之元廉希憲嘗更新焉

白水書院在枝江縣西三里元拔都府抹溫司建

車渚書院在岳州府澧州東三十里其地一名螢渚晉車

胤發瑩讀書處

文山書院在澧州治南唐李羣玉讀書之所文山羣玉字也

溪東書院在澧州治東宋范仲淹嘗遊此後人慕之作書院祀焉

城南書院在長沙府城南臨湘門外宋張栻講學之地

碧泉書院在湘潭縣西七十里宋胡安國南遊築室其子宏與張栻講道于此以近碧泉因名

文定公書院在長沙府治中祀胡安國

東萊書院在醴陵縣北四十里宋東萊呂祖謙讀書于此  
漣溪書院在湘鄉縣東南漣水濱初在崑崙橋西宋嘉定

間真德秀帥潭命知縣徐質夫置立扁其堂曰春風德祐初燬知縣趙晟重建于漣水東元至正中知縣王文彪復移建漣水西

東岡書院在長沙縣東二十五里元中書左丞許有壬父號東岡嘗讀書于此因賜額

喬岡書院在長沙縣西北九十里喬口鎮舊有三賢堂祀屈原賈誼杜甫元元統中邑人黃澹因設義學於此詔賜今額

文靖書院在瀏陽縣南宋楊時嘗宰是邑後人因建書院名以其謚

湘西書院在善化縣湘水西宋時慈潭士以居學肄業爲

重州學生月試積分高等升湘西岳麓書院生又積分  
高等升岳麓精舍生潭人號爲三學生劉輔之重建  
慶州書院在益陽縣治南江中元邑人劉履泰講學之所  
事聞詔授慶州書院山長

南軒書院在衡州府張栻朱熹講學處

石鼓書院在衡州府石鼓山唐元和間州人李寬讀書之  
所宋初勅賜額朱文公有記

南嶽書院在衡山掌教有官育士有田宋開禧中建寶慶  
中遷于集賢峯下元因之

杜陵書院在來陽縣北二里杜甫墓前

清溪書院在安仁縣清溪宋周必大嘗讀書于此後人因



建書院元至正間縣令王雪巖重修

沅陽書院在常德府城東北黃龍坡宋末丁易東建號石壇精舍元賜今額遺址碑刻尚存

浯溪書院在永州府祁陽縣治南元縣尉曹圭與子堯臣創中大殿奉先聖殿左祠祀唐元結顏真卿

濂溪書院在道州學西祀宋周惇頤理宗賜額

鶴山書院在靖州治北宋魏了翁建自爲記鶴山了翁號也

作新書院在靖州學旁宋黃榮知靖州時建取書作新民義

觀瀾書院在柳州興寧縣西建置未詳

四川

紫巖書院在成都府綿州縣治南宋張浚讀書之所

丹梯書院在巴州南龕山宋時建

果山書院在順慶府城北五里蜀漢譙周建後郡人邊叔達以秘書監歸隱于此藏書萬卷今爲南充學

柳溝書院在敘州府富順縣東九十里宋李文淵建

雲臺書院在南溪縣北雲臺山上有石鐫雲臺書院四大字尚存元廖蜀望有詩記其勝

南溪書院在南溪縣治西北唐楊發詩美其景似桃源

濂溪書院在合州學旁祀宋周濂溪

北巖書院在涪州治北宋程頤註易于此黃廷堅榜曰鈞

續文獻通考

卷之六十一

二十五  
九十三京

深堂嘉定中范仲武請爲書院塑像祀之

鳳山書院在夔州府大寧縣鳳凰山建置未詳

南陽書院在夔州府宋孟琪建以處四方遊士

竹林書院在夔州亦宋孟琪建以行四方遊士

金華書院在潼川府射洪縣北元至正間建肖唐陳子昂像祀之

張九宗書院在遂寧縣書臺山唐貞元間建

東臺書院在鹽亭縣西南二十五里宋任伯傳讀書處

東館書院在眉州城西七十五里東館鎮宋紹興初鄉士

創爲肄業之所馮時行有記元至正間重修

柵頭書院在丹稜縣東北二十五里柵頭鎮宋紹興間縣

今馮時行建

鶴山書院在瀘州治南宋魏了翁建

五峯書院在瀘州城北五峯山下宋慶曆間尚書楊汝明  
創爲士友講會之所

龍門書院在江安縣東七十五里宋乾道中鄉士呂伯祐  
建

魏了翁書院在邛州蒲江縣治北宋嘉定間建又了翁嘗  
築室白鶴山下曰鶴山書院聚書授徒由是蜀人始知  
義理之學

玉淵書院在舊黎州城內宋開禧初知縣薛紱建于崇德  
祠西

福建

勉齋書院在福建府城內宋儒勉齋黃榦讀書之所

三山書院在福州府西湖旁宋提刑王佖建

古靈書院在侯官縣陳襄讀書處

尊拙書院在侯官縣三山驛西宋林之奇講學處

龍江書院在福清縣東南宋時建

石塘書院在福清縣宋景定四年立林公遇講學處

城南書院在古田縣南宋時學元改爲書院

浣溪書院在古田縣西宋時建

螺峯書院在古田縣西宋時建

藍田書院在古田縣東宋時建以上三書院皆朱熹書扁

嵩高書院在古田縣元時卽學基建書院

清源書院在泉州府宋嘉泰中郡守宗希袞建

歐陽書院在泉州府唐歐陽詹讀書于此

大同書院在同安縣元至正間邑令孔公俊建請額賜名  
以祀朱文公

石井書院在泉州府晉江縣西南石井鎮舊名鰲頭精舍  
朱松鎮于此熹官同安皆有教及民嘉定中鎮官游絳  
立書院塑二先生像祀焉

泉山書院在晉江縣宋咸淳中建今改爲學

建安書院在建安縣郡守王埜立以祀朱熹

紫芝書院在建寧府學宋時建以待四方賢士

鰲峯書院在建陽縣西崇泰里唐尚書熊秘建

鴈山書院在建陽縣鴈山下宋儒游酢建又崇安縣建書

院以祀酢亦扁曰鴈山書院

雲谷書院在建陽縣朱文公建

雲莊書院在建陽縣嘉熙中建祀劉燭

考亭書院在建陽縣西三桂里唐御史黃端構亭以祀其

先朱熹晚年居此理宗詔立書院親書扁額

同文書院在建陽縣崇化里朱熹建

瑞樟書院在建陽縣劉仲會建劉氏視樟榮枯爲盛衰

武夷書院在崇安縣武夷山朱熹建精舍于此景定中命

建書院設山長

廣峯書院在建陽縣西北峯下宋蔡沈建理宗書扁賜之  
文定書院在崇安縣西元縣尹彭庭堅建祀宋儒胡安國  
以其子寅寧宏及從子憲配

屏山書院在崇安縣東南屏山下一名忠文元時建前祀  
孔子後祀劉子翬朱熹劉珙其一在建安後改爲學

南山書院在崇安縣宋儒蔡沈建

湛盧書院在松溪縣西元末建祀朱文公

諫議書院在延平府沙縣治西宋陳瓘嘗爲諫議嘉定初  
郡守余景瞻卽其故宅建書院

豫章書院在沙縣元至正中羅從彥五世族孫建

鳳岡書院在沙縣鳳凰山下宋邑人黃顥建



九龍書院在延平府有宣聖四配十哲像及楊時羅從彥李侗朱熹四公像蓋四公講學所也

龜山書院在將樂縣封山麓卽龜山先生舊宅宋咸淳初建

延平書院在南平縣劔津之洋宋嘉定間郡守陳宓建南山下祀延平先生李侗後守董洪徙此有禮殿祠堂明誠忠恕敬義中和四齋及光風霽月亭

景溪書院在政和院祀朱文公父子

雲根書院在政和院朱松所建文公謁祖基必信宿于此今廢

南溪書院在尤溪縣治南宋朱熹生于此嘉熙初縣令李

修建祠以祀熹及其父松咸淳初增置書院于其右元分祠爲二

雙峯書院在順昌縣宋咸淳中邑人廖邦傑建祀楊時廖剛朱熹廖德明四先生

涵江書院在興化府莆田縣東北宋知軍事楊棟建祀唐莆田令先聖裔孔仲良理宗賜御書扁元至大中訪求孔氏之後得五十三代孫敬山遂以明經舉充涵江書院山長令世紹其職

樵溪書院舊在邵武府東門外宋景定中知軍錢謙孫建以祀丞相李綱元時移置城內樵樓五曲之上

雲巖書院在光澤縣雲巖山下宋果齋李方子講學之所

元天曆中縣尹况達建虞集有記

雲谷書院在建寧縣南宋待制俞豐讀書所後致政歸扁曰雲谷書院有怡雲來薰致爽舒嘯浮香諸亭

崇仁書院在光澤縣北元至正中邑人龔永劉濂建

翠雲巖書院在汀州歸化縣宋熙寧間立張若谷陳世卿避亂讀書于此

龍江書院在漳州府登高山舊爲臨漳臺宋朱熹守漳時將築室講學未果後守危楨創書院以成其志元泰定間郡儒黃元淵亦建龍江書院于城外東北虞集有記  
丹詔書院在漳浦縣南三都宋紹定間南詔場西尉周申建淳祐中郡守黃朴書額

東山書院在福寧州宋惇祐中邑人林仲明讀書所  
來青書院在寧德縣姚周二族朔

### 廣東

濂泉書院在廣州府城內宋建祀濂溪周惇願

尊韓書院在陽山縣東唐韓愈讀書于此後人因建書院  
丞相書院在連州嘉魚場之左宋相張浚嘗寓此後人建  
書院祀之

古岡書院在新會縣治西南元至元間縣尹沈壽建

湘江書院在韶州府帽子峯南麓宋淳祐間楊大異建祀

### 周惇願

涇暉谷書院在英德縣涇暉谷宋景德初郡守王仲達奉

詔建後慶曆初守宋任天禧中守臧制修之

孔林書院在南雄府城東一百里唐憲宗時曲阜孔戣爲  
嶺南節度使因家焉後孫振玉始建書院

豐湖書院在惠州府歸善縣南宋淳祐中建

張留書院在惠州石埭山宋丞相留正秘書郎張宋卿微  
時共學于此

羅浮書院在博羅縣西八十里宋建

鰲峯書院在龍川縣舊學元建

韓山書院在潮州府治西南隅元郡守王翰建以祀唐韓  
愈趙德及宋陳堯佐吳澄記

元公書院在潮州府學西宋元公周惇頤嘗潛廣東其孫

梅史爲郡時建

得全書院在潮州府城內宋紹興間宰相趙鼎謫潮州號得全居士其後六世孫箕翁爲郡時建

星巖書院在肇慶府城北五里宋郡守包拯建

三洲書院在德慶州東七十里三洲巖畔祀宋周惇頤

濠溪書院一在四會縣治北金鷄山麓一在陽江縣學東

熙寧中周惇頤提刑嶺南多惠政故皆祀之

茂山書院在高州府城南八十里晉時龍驤將軍王濬謫

居高涼自號茂山嘗以禮教化民後人建書院

松明書院在石城縣西一百二十里宋蘇軾建

翔龍書院在吳川縣南一百三十里宋景炎中宰相陳宜

中建

平湖書院在雷州府城外西湖之東宋冠準蘇軾蘇轍相繼謫此軾有西湖平狀元生之語郡守陳大震取其語作書院而名之元郭思誠重修呂思誠記

文明書院在樂平千戶所城內宋蘇軾謫儋州徙濂州道經于此謂人曰斯地景勝富有文明之祥後人遂卽其地建書院扁曰文明元彭從龍重修凌光謙作記

東坡書院在瓊州府城北宋蘇軾謫昌化軍時寓此後人因其號爲建書院元時嘗設山長趙孟頫書扁

桐墩書院在瓊山縣東五里貢士陳文徵建會鄉子弟講學于此

廣西

宣成書院在桂林府治北宋景定間經畧朱禔孫以張栻  
呂祖謙嘗遊此合二公謚爲名請建書院理宗書額賜  
焉

清湘書院在全州北二里宋守林岳因柳開讀書地築室  
館士後守程瑜請賜額趙必愿增修魏了翁記

駕鶴書院在柳州駕鶴山有碑記文字剝落

真仙書院在融縣真仙岩前宋守李興時所建

龍溪書院在慶遠縣城西二里宋嘉定間建中設孔子像  
旁立黃廷堅祠

江東書院在平樂府富川縣北六十里宋淳祐間澹然居



士毛基建

勾漏書院在梧州府容縣舊爲州學宋建

皇明

國朝修建書院初未有禁至嘉靖十七年夏四月吏部許  
讚言撫按司府多建書院以聚生徒供億科掇亟宜撤  
毀從之萬曆十年閣臣張居正以言官之請槩行京省  
查革士論紛然不平然竟亦不能盡撤今據舊額書之  
北直隸

明道書院在青州府開州治內宋時爲程純公建 本朝

萬曆三年圻知州事重修有記

彌石書院在開平衛治東南隅 本朝建

雲州書院在雲州堡東南 本朝重建

南直隸

獨山書院在鳳陽府治東南獨山麓 本朝嘉靖初御史

張維恕建

文正書院在蘇州府治范仲淹宅東元至正間建後毀

本朝宣德間重建

和靖書院在府治東南 本朝嘉靖五年重建於府城內

龍興寺

鶴山書院在府城西南隅宋魏了翁第舊址 本朝宣德

間重建

金鄉書院在府治澹臺坊內宋贈澹臺子羽爲金鄉侯故

名 本朝嘉靖五年胡纘宗建

練川書院在嘉定縣學南 本朝正德間提學張鰲山廢

南寺創建

東坡書院在常州府東南祀蘇軾 本朝弘治間建

滌溪書院在鎮江府丹徒縣東南宋周惇頤嘗居焉 本

朝正統中從黃鶴山移建于此

包公書院在廬州府城南香花墩上 本朝弘治年建

毛公書院在廬江縣東北七十里 本朝嘉靖初卽漢毛

義讀書故址建

采石書院在太平府蕪湖縣昇仙橋西狀元坊內 本朝

正德間建

宛陵書院在寧國府治西 本朝正統年建

鳳山書院在寧國縣儒學旁 本朝正德間知縣王時建

甘泉書院在池州府化成寺東 本朝爲禮書湛若水建

陽明書院在化成寺西 本朝爲王守仁建

嘉靖十六年春二月御史游居敬疏乞戒邪僻大臣以  
端士習言王守仁之學主于致良知湛若水主于體認  
天理皆祖陸九淵而少變之以號召好名媒利之士然  
守仁謀國之忠應變之才猶不可泯若水迂腐之儒廣  
收無賴私剏書院其言近似其行大非乞戒諭以正人  
心禮官覆言王守仁旣經禁革不必更議若水掌教南  
雍間有生徒附和標榜居敬責備太甚若水年已七十

屢乞休致方且慰留可再議耶 上曰若水既有成命  
書院令所司毀之

東山書院在徽州府祁門縣東南 本朝正德中知府留  
志淑廢東岳廟爲之中祀環谷先生汪克寬

龍山書院在安慶府桐城縣治西卽太霞宮故址 本朝  
嘉靖間建祀周程張朱黃勉齋游廣平

皖山書院在潛山縣卽天寧寺故址 本朝知府胡纘宗  
以伊川晦庵嘗居潛而黃直卿游定夫皆有政績祀之

## 江西

正學書院在南昌府治東 本朝嘉靖中提學副使王宗  
沐建祀周敦頤程明道

馬融書院在南康府建昌縣 本朝正德間知縣周廣建  
釣臺書院在嚴州府城東五十里嚴光隱釣處宋時建  
本朝正統初知府萬觀重修又構清風高節二軒大學  
士楊溥有記

惜陰書院在臨江府新淦縣治東陶侃讀書臺下 本朝  
成化初建夏寅記

金川書院在新淦縣 本朝正德七年李夢陽建祀練子  
寧

一峯書院在吉安府永豐縣儒學西 本朝弘治間建祀  
修撰羅倫邵寶記

雲興書院在萬安縣治西宋時建 本朝隆慶元年圻知

縣事重修有記

陽明書院在贛州府濂溪書院後王陽明講道于此 本朝士人建

山東

尼山書院在兗州府 本朝永樂十五年重建

東萊書院在萊州府 本朝景泰五年重修

河南

應天書院在歸德府城西北隅 本朝嘉靖間以社學改建

錦襄書院在睢州駱駝岡舊爲僧寺 本朝嘉靖初改建  
志學書院在南陽府城外西關

豫山書院在豫山之麓俱 本朝成化八年知府段堅建  
汝南書院在汝寧府城南五里 本朝成化十一年建  
涑水書院在光山縣西祀宋司馬光 本朝正統九年重  
修

青雲書院在汝州郊縣城內 本朝成化五年建

程子書院在寶豐縣 本朝成化十六年建

紫雲書院 成化十五年兵部右侍郎李敏奏襄城縣紫  
雲山之麓臣市地三十畝有奇建屋若干楹積書數千  
卷日與學者講讀其中願藉之于官以爲社學 賜額  
爲紫雲書院

湖廣



濂溪書院在武昌府學前舊爲射圃 本朝嘉靖四十三

年巡撫改建

鳳山書院在漢陽府學後 本朝趙蕃蔡鑑讀書處

郢門書院在承天府陽春臺左 本朝洪武中曹國公李文忠鎮郢時建

昭明書院在襄陽府學西 本朝汪道昆建

鳳棲書院在襄陽府治東龐德公宅 本朝正德中爲書

院祀龐統司馬徽

五賢書院在鄖陽府治北 本朝正德間建祀周程張朱

二程書院在黃州府黃陂縣魯臺山 本朝景泰中蔡受

建

龍峯書院在岳州府華容縣聞覺寺旁 本朝黎淳劉大

夏讀書處

東山書院在寶慶府城東 本朝嘉靖中建祀周敦頤以

張九成配享

陽明書院在辰州府東王守仁謫貴州講學于此鄒守益

羅洪先記

福建

石井書院在泉州府晉江縣西南石井鎮祀朱文公父子

本朝重建

鰲峯書院在建寧府建陽縣西崇泰里 本朝正統中重

修

考亭書院在建陽縣西三桂里 本朝宣德中重修

武夷書院在武夷山

同文書院在建陽縣崇化里俱 本朝正統中重修

屏山書院在崇安縣東南屏山下祀劉子翬朱熹劉珙

本朝洪武中重修

湛盧書院在松溪縣西祀朱文公 本朝景泰中重修

諫議書院在延平府沙縣治西陳瓘宅 本朝永樂中修

龜山書院在封山之麓楊時宅 本朝洪武七年建

延平書院在劍津之陽祀李侗 本朝永樂初重建

南溪書院在尤溪縣治南朱文公生此 本朝永樂中重

修

薌江書院在漳州府城東北二十里 本朝洪武初知府

錢古訓建祀朱文公

鴻江書院在漳浦縣東十七都 本朝洪武中鄉人陳則

葵建授徒講學

泰亨書院在長泰縣南登科山 本朝洪武末教諭章叅

建以教鄉士子

狀元書院在登科山之西 本朝正德六年副使楊子器

建塑狀元林震像

東瀛書院在玄鍾所舊爲佛刹 本朝嘉靖五年叅政蔡

潮改建塑朱文公像于中以北溪勉齋配

廣東

濂泉書院在廣州府城內祀周濂溪 本朝正統中重建  
崧臺書院在肇慶府治東二里石頭庵 本朝正統間改  
爲書院

廣西

宣城書院在桂林府治北祀張栻呂祖謙 本朝洪武初  
以其地爲桂林縣學正統間復建于學之西

清湘書院在全州北二里 本朝永樂間重修

三元書院在梧州府藤縣治西宋馮京讀書處 本朝建

純心書院 嘉靖三十一年 楚王英僉奏請書院額

上賜名純心并四書五經集註各一部後屢有請 萬  
曆十年議准 宗室中有讀書好禮奏討書籍及以書

院請名者禮部俱與題覆請給但不許假借虛名以滋欺罔書籍簿數書院名額俱取自上裁其蓋造書院止令自備工料不得因而干涉有司煩擾百姓違者許撫按官叅治

義學

宋

侯宣衡陽人少遊四方還家築室道旁俾遊學之士館焉行之二十年曾無倦色遠近號曰侯家書院

洪文撫南康建昌縣人於所居雷湖北創書舍集學者太宗飛白一軸曰義居以賜之

汪紹婺源人開義學教鄉里子弟割田三百畝以充膳延

舊邑簿呂廣問爲師

林國鈞莆田人創書堂延林光朝爲師復置田以贍來學之士學者空郡從之謂之紅泉義學

黃問字公裕莆田人創學于居廬之南以聚四方英俊號上林秣齋其齋中有五規一曰修身謹行二曰立志抗節三曰潛心經術四曰學通世務五曰限日收功

范仲淹蘇州人建義學于天平山西延師以教同族及四方學者號爲范氏義學中有孔子廟後又增仲淹祠中清白堂左右設敬身知本兩齋

蔣沐東陽人景定五年建義學于縣南以訓四方來學者號楊城義學元至正間沐四世孫大同重修學者益衆

鍾鼎上猶人嘗觀范仲淹義田借姪日新置義莊建書院  
教鄉族子弟子三傑登紹興進士

方泳莆田人天禧間與弟洞築義齋以來四方賢士歲不  
下五十餘人時號壽峯義齋

新昌縣有萬卷堂爲義學尚書石待旦所建杜衍輩由此  
登科凡七十二人

劉允迪玉山縣人割田荆室聘名士以教族子弟及鄉人  
願學者號曰劉氏義學 朱文公記畧曰今士大夫徒  
步至三公然一日得志則高堂深池和鐘舞女所以自  
樂其身者惟日不足雖原有餘粟府有餘錢不爲里黨  
災害足矣義學之舉固未暇及也如劉侯者身雖寵而



未登六品家雖溫而未能千金乃其用心如此可謂賢於人遠矣

王必正尤溪人宋紹定間慕范文正公爲人以郭外田五百餘畝勸義莊以資族人冠婚喪祭之費又設義塾延師以訓族里子弟子四人慈恭勸慈皆登進士第

王沂之晉江人端平間以曾祖秉嘗立義齋延師誨學者遺命子起震繼其志闢堂于家之南扁曰文雅列齋四捐田三百餘畝以贍師生真德秀表其閭曰義塾

周天賦仙遊人與弟勸義塾撥田租七十斛以供束修之費

元

邵天驥其先洛人高祖宗穆始家華亭胥浦鄉志在澤物  
開義塾以教鄉之子弟割田二百餘畝給之

姚玉用華亭人至治中割田立義庄以周宗族鄉黨建義  
塾以教鄉之子弟後郡守孫秉禮聞其義委葺西湖書  
院遷義塾其中以便學者

吳森嘉興人家饒於貲施予不吝嘗捐田二頃建義塾訓  
鄉人至大間廉訪使以名聞表其門曰義士

韓元善字大雅汴梁之太康人仕至中書左丞至正交鈔  
初行賜近臣各三百錠元善以買田六百畝爲義塾延  
名士教族人子弟

陸天祐鄞縣人欲建義塾以教鄉子弟未就而卒遺命子

居敬思誠置田廣居構學一區于東湖之里崇奉朱文公像浙東帥王本齋命名曰東湖書院割田一頃六十畝竒以爲報祀饌廩之需建先進祠祀鄉先生陳文介公而下凡十人延師講學以淑一鄉子弟

應本仁字本立鄞人素慕范文正爲人建義莊創屋舍五百餘間割慈谿腴田五百餘畝以濟鄉親貧乏又卽其中爲義塾延名師以訓導鄉親子弟供膳服用悉有常制時其出納定其條約使後裔世守之世傳爲應家館